

ՅԵՏԽՈՐՀՐԴԱՅԻՆ ՇՐՋԱՆԻ ՀԱՅ ՔՆԱՐԵՐԳՈՒԹԵԱՆ ՄԻՔԱՆԻ ՊԱՏԿԵՐ

ԿԱՐԻՆԷ ՌԱՖԱԵԼԵԱՆ
karine.rafaelyan@mail.ru

ՄՈՒՏՔ

Ընդունում է ասել, որ խորհրդային վարչակարգի պայմաններում ապրած արուեստագետների վրայ դրոշմում է գրաքննության սահմանափակումների կնիքը եւ այն իր գոյութիւնն զգացնում է նաեւ յետխորհրդային ժամանակահատուածի ստեղծագործական որոնումներում ու երկնումներում: Այս իմաստով ամենախոցելին, թերեւս, գրականութիւնն է, առաւել եւս՝ քնարերգութիւնը, որն իր ստեղծողի հոգու, ներաշխարհի ամենաճշգրիտ արտապատկերն է, եթէ անկեղծ է, չպարտադրուած, արհեստականօրէն չգունազարդուած ու չաղաաղուած:

«Մեր անցած ուղին դաժան էր, դժուար: Մարդու կեանքի մանրամասները մեծ մասամբ գիտի ինքը միայն՝ մարդը: Մանաւանդ՝ ստեղծագործ մարդու դէպքում: Ես յիշում եմ՝ ինչ դիմադրողական ուժեր կային մեր դէմ. գրական անճաշակութիւն, բռնապիրական երկրի գրչակներ, գրականութիւն, որը ստիպում-փաթաթում էին ընթերցողի վզին, որովհետեւ վիթխարի պետութիւնն էր այդ գրականութեան թիկունքին: Մարդու կաղապարման մեծ գործընթաց էր դա, որը յետոյ քանդուեց, կաղապարը փշրուեց: Գրականութիւնը ազատութիւն է ուզում: Պիտի լինի խօսքի ազատութիւն: Եւ ըստ այդմ էլ գրողը կողմնորոշում է: Նա է յաղթում, ով կարողանում է ճերքել պատնէշը. անհեթեթութեան, թշնամանքի, գրական անորակ ճաշակների պատնէշը: Այս ամէնը մեծ թակարդներ են, որոնք սպասում են, հետեւում են մարդուն: Ստեղծագործ մարդուն՝ առաւել եւս»¹. այսպէս է բնորոշում իր եւ սերնդակիցների ստեղծագործական կեանքի խորհրդային եւ յետխորհրդային տարիները բանաստեղծ Արտեմ Յարութիւնեանը:

Եթէ քնարերգութիւնն իսկապէս հոգուց է ծնում, ապա այն յուզում է իւրաքանչիւրին՝ անկախ հեղինակի ապրած ժամանակաշրջանից, նրան վերահսկող վարչակարգից, գաղափարական պարտադրանքներից եւ ինքնադրսերտման արգելանքներից:

Այդպիսի հեղինակների պակաս չի ունեցել հայ գրականութիւնը ո՛չ խորհրդային, ո՛չ էլ յետխորհրդային տասնամեակներին: Եւ այն բանաստեղծները, որոնք իրենց ստեղծագործութիւններով առանձնանում էին նախորդ հասարակարգում, անկախ Հայաստանի պայմաններում եւս շարունակեցին հաստատակամ քայլել իրենց իսկ բացած բանաստեղծական ակօսով, բանաստեղծել ու յուզել ընթերցողներին՝ ասես ոչինչ էլ չէր փոխուել իրենց ստեղծագործական ներշնչանքի անդաստանում:

Իհարկէ, անդրադառնալ յետխորհրդային շրջանի բոլոր բանաստեղծներին մէկ յօդուածի շրջանակներում անհնար է: Վտանգաւոր է անգամ

թուարկել անունները, քանի որ ապահովագրում չես կարելու մէկին բաց թողնելու անյարմարութիւնից: Այս ուսումնասիրութիւնը սոսկ գրականագիտական մի հայեացք է՝ ուղղում արդի հայ քնարերգութեան աւագ սերնդի որոշ ներկայացուցիչների՝ յետխորհրդային շրջանում գրում ստեղծագործութիւններին: Այն յաակնութիւն չունի աւարտուն խօսք ու քնութագիր դիտարկուելու: Այն չի ներառում մահացած հեղինակներին, որոնք քիչ չեն եւ թողել են պատկառելի բանաստեղծական ժառանգութիւն: Լիտուիգ Դուբեանի, Հրաչեայ Թամրազեանի, Յովհաննէս Գրիգորեանի, Հրաչեայ Սարուխանի, Արմէն Մարտիրոսեանի, Արտակ Համբարձումեանի ստեղծագործութիւններուն անդրադառնալու առիթը կ'ունենանք *Հանդէսի* յաջորդ տարեգրքում:

Իսկ այս յօդուածում արդի հայ բանաստեղծութիւնը ապրեցնողների մի պատկանելի խումբ ենք ներառել: Բանաստեղծներ, որոնք մեր կողքին են ու ստեղծագործում են մեր ապրած ժամանակի մէջ:

Հենրիկ Էդոյեան² (ծն. 1940)

Հենրիկ Էդոյեանը յետխորհրդային շրջանում հրատարակել է.- *Քայլեր եւ Սրտերներ* (Պէյրուֆ, 2001), *Յեղորոթիւն* (Երեւան, 2001), *Երեք Օր Առանց Ժամանակի* (Երեւան, 2005), *Փողոցի Բաժանուող Մասում* (Երեւան, 2006), *Երկերի Ժողովածու, Հտր. 1, 2* (Երեւան, 2010) գրքերը:

Հենրիկ Էդոյեանի բանաստեղծութիւնը թանձր խոհի աշխարհն է: Նրա գիրը լրջախոհ է եւ մղում է լրջախոհութեան: Այդպէս նա պատմում է Աստծոյ, աստուածայինի, մօր, իր քաղաքի, հայրենիքի, իր ապրած ժամանակի, հասարակական-քաղաքական անցուղարձերի, իր ներգագցողութիւնների մասին: Յովհաննէս Շիրազի մայրերգութեանը սովոր հայ ընթերցողը Էդոյեանի պարագայում տեսնում է բոլորովին այլ մայրերգութիւն: Այն անելի շատ բանաստեղծի ընկալման, մօր հանդէպ ունեցած զգացումների քնարերգութիւնն է, քան բուն մօր կերպարի: Մօր կեանքի տառապալից ուղին քննող բանաստեղծը գրում է.

*Քայց դու կարողացար անցնել քո ուղին
ինչպէս ուխտագնաց եւ քո մէջ պահել
այն փշերը, որոնք քեզ տրուել էին
բախտի կողմից, երբ ծնողը քեզ մեկնած ամուր
մի հրեշտակ ասաց - «Կարո՞ղ ես սա փանել...»,
դու նրան ասացիր - «Կամքը քոնն է, տուր»³:*

Քաղաքի անհետացող դիմագիծը մղում է բանաստեղծին եղերերգ հիւսել հին շէնքերին: Ահա «Տաճարի Կառուցումը» բանաստեղծութիւնից մէկ քաղուածք.

*Քաղաքի կենտրոնում փաճարն է դանդաղ
բարձրանում հսկայ բետոնի անթափանց
զրահներով - մարդ մտնող հրասայլ, որ չի*

համբերում կրակը թափելու ծառերի, խոտերի,
տների, պուրակների, անցորդների վրայ,
դանդաղ բարձրանում է փլափլակների միջից
հարիւրամեակների, անանուն սերունդների,
լլկուած հոգիների, շուրջը սփռուած
քայքայուող շինութիւնների, դատարկ
կաֆէների⁴, վախուորած խանութների,
ինքնագոհ դէմքերի, նիհար ուսերի, ելնում է
կապկպուած երկաթէ գօտիներով,
մետաղների դուրս ցցուած ծայրերով,
տախտակի կտորներով, (սա յիշեցնում է
Ղազարոսի յարութիւնը)⁵:

Բանաստեղծին հետաքրքրող թեմաների ծիրում յաճախ յայտնւում են
բանաստեղծութեան, բանաստեղծի, հենց իր իսկ անձի շուրջ պտտուող
ներշնչումները: Նա որոշակիանում եւ վերացարկում է այս դաշտում, ար-
տածում բանաստեղծութեան մասին իր բանաձեւը.

Պոէզիան ծերացել է,

նրա սպուները չի ծածկում այլեւ ոչ մի մերկութիւն⁶:

Էդոյեանը փորձում է հասկանալ ու իր ընթերցողի համար մեկնել 21րդ
դարի էութիւնը: Այս թեմային անդրադարձումներում յաճախ է յայտնւում
դիցաբանական Սիզիփոսի կերպարը՝ ապարդիւն գլորուող քարի խորհր-
դանիշով: Նա անճանաչելի դարձած ժամանակի համապատկերում յիշում
է այն տղային, որը

...մտնում է այգի, նստում կարուսել,

(որի երգը նա վաղուց է լսել),

սակայն աչքերը նրա արցունքով

աշխարհում արդէն չի տեսնում ոչ ոք⁷:

Բանաստեղծը որոնում է նոր օրերի խորհուրդը, ինքն իրեն՝ այդ իրա-
րայաջորդ օրերի յորձանուտում, սակայն ինքնագտնումի ճիգերը ասես
դատապարտուածութեան դրոշմն են կրում, ամէն բան անդէմ է, անբո-
վանդակ ու անհեռանկար.

Օրը գլորում էր

քաղաքի վրայով,

գնում, հեք գալիս

ինչպէս Սիզիֆի քար:

Եւ կէսօրուայ մէջ

փողկապն արծակելով

փորձում էր ապրել

մի հին տղամարդ:

Հոգին խաչում էր

բայց մարմինը դեռ

շրջում էր փողոցում.
ուր միակ շօշափելին
հենց իր սպուներն էր⁸:

Երկու տարբեր հազարամեակներում ապրած մարդու ճակատագիրն ասես բեկուել է, ու այդ բեկումի մասին բանաստեղծությունը խոր փիլիսոփայական ատաղծով է հիատում: Մարդը յայտնուել է անսովոր, նորատիպ չափումներում, որոնք քմահաճօրէն տարուբերում են նրան, ինչպէս խամաճիկ.

Կեանքը շար է մօտ,
թէւ չի երեսում: Ինձ հետ խօսէք, համբերութեան
արթուն ոգիներ, 21-րդ դարի
էկրանը ծեզ համար փոքր է չափազանց:
Դուք չունէք Կիրակի օր: Դուք չունէք արձակուրդ:
Դուք ապրում էք յաւերժական մի գիշերուայ մէջ
եւ գծում սիրտը մարդու
իբրեւ մի երկնային երկրաչափութիւն⁹:

Չորս պատից անդին՝ փողոցում, «անցնում է շքերթը մարդասպաններին», որոնք քաղաք են խուժել Աստուծոյ նիրհելու պահին: Եւ երազի վերածուող իր հնամեայ հայրենիքի փրկութիւնն այս քառսից բանաստեղծը տեսնում է աստուածաշնչեան ոլորտներում.

Թէ գոնէ մի պապուսիան
չբացես դէպի երկինք -
յոեսնելու պտույտները երկնային
ոլորտների,
բոլոր դռները երկրային ճշմարտութեան
կը փակուեն քո առջեւ:
Ոչ մի դուռ չի բացուի
առանց երկնքի: Չկայ
ուրիշ ուղի¹⁰:

Սիրոյ քնարն անգամ Էդոյեանի բանաստեղծութեան մէջ ներհիատած է աստուածաշնչեան նիւթին: Իբրեւ սիրոյ դրսեւորման բարձրագոյն տեսակ՝ նա վկայաբերում է «սիրել մերձատրին» պատուիրանը, որից յետոյ «անհնարին ոչինչ չկայ/սիրոյ ճիգերի մէջ»¹¹:

Արտեմ Յարութիւնեան (ծն.1945)

Արտեմ Յարութիւնեանը յետխորհրդային տարիներին հրատարակել է հետեւեալ գրքերը.- Նամակ Նոյին Կամ Յոյսի Ահագնացում (Երեւան, 1997), Հռոտաբապօթմներ 'Շուշի' եւ 'Քաթելոն' Հիւրանոցների Աշտարակից (Երեւան, 2010), Հալոյնփոր (Երեւան, 2014):

Մեր ժամանակների աշխարհաքաղաքական, հայաստանեան ներքաղաքական, ընկերահոգեբանական խնդիրների մի համահաւաք տեղեկա-

գիր է յիշեցնում Արտեմ Յարութինեանի բանաստեղծութիւնը: Անգամ դժուար է այս հեղինակին բանաստեղծ կոչել: Նրա գրականութիւնն ասես միջազգային եւ հանրապետական դատական ատեաններին ներկայացուած հայց լինի, որում հայցուորը տեղ-տեղ տրուում է բանաստեղծական զեղումներին: Նա ողբերգաերգիծական եզրոյթներով բնութագրում-համապատկերում է մեր ապրած ժամանակը, երեան հանում «հարուստ ցիւլածինների շարժում», «ազնիւ ֆինանսական հզօր մաֆիա», «օժշոր երազներ», «քցող բանկեր» ու սրանց նման այլ ախտածին երեւոյթները: Նրա գրականութիւնը վկայում է հեղինակի՝ հայ գրական բառուբանին հրաշալիօրէն տիրապետելու փաստը, բայց նաեւ հաւաստում, որ այդ լեզուով մտածող ու գրող հեղինակը, տրուած ժամանակի եւ նիւթի պարտադրանքին, ոսկեղնիկ մայրենիին հմտօրէն համադրում է ռուսերէն եզրոյթներ, ոչ գրական արտայայտութիւններ, կենցաղային բառաշերտ եւ անգամ՝ հայկոյանք:

Հիմնականում առանց յանգերի գրող հեղինակը երբեմն անդրադառնում է յանգին: Բայց նրա բոլոր գործերն էլ պատումային բնոյթի են: Ասես մէկ ընդարձակ պոէմի տարբեր հատումներն ենք կարդում Յարութինեանի առանձին բանաստեղծութիւններում: Նա իրեն տանջող խնդիրներին, դրանց շուրջ խորհրդածումների, այդ խնդիրներին առնչուող պատմական անձնատրութիւնների մասին է գրում: Նրա չափածոյում մշտապէս ներկայ են Թումանեանը, Չարենցը, Մանդելշտամը, ինչպէս եւ մերօրեայ վայ-հերոսները՝ համաշխարհային ու հայաստանեան քաղաքական-կուսակցական գործիչներ, քրէական յանցագործներ եւ, իհարկէ, բազմաչարչար հայ ժողովուրդը: Յարութինեանի չափածոյում, իբրեւ մտահոգութեան կենտրոն, կիզակէտ, շեշտադրում է իր բնօրրան Արցախի, նրա անցած ու անցնելիք պատմական ճանապարհի թեման: Իր ու մեր ժամանակն այսպէս է բնութագրում գրողը.

Դառը ժամանակներ,

գաղտնի ու անտես փշալարի դէմ-դիմաց:

Հիմա անելի շարք քաղաքական կուսակցութիւն կայ,

քան բրդաթել¹²:

Հայաստանը հեղեղած նոր չարիքը՝ կուսակցամոլութիւնը, բանաստեղծի թիրախում է: Նա ջղաձգում է այդ սարդոստայնի կապանքներում: Ու այդ ջղաձգումը նրան մղում է վերերկրային դատողութիւնների տիրոյթ.

Այսքան կուսակցութիւն ունեցող երկիրը,

պարզ է, մի օր հասնելու էր քաարան,

որ սողացող բոյսերը խրապ են կարդալու,

կանաչ ձեռքեր են հողից բարձրանալու,

որ ջնջեն ամօթը կեղծիքի,

սրբեն թոփշը նախանձի, փոշու, ալեւութեան,

եւ շօշափուկներն ամէն անցողիկի,

որով մենք յաւերժն ենք կառուցում¹³:

Բանաստեղծը փորձում է համաժամանակեայ հայեացք ձգել Հայաստան Աշխարհի վրայ, հասկանալ, թե իր հազարամեակների պատմութեան ո՞ր շրջափուլն է ապրում տառապեալ այս երկիրը: Եւ ցաւով արձանագրում է աւանդական նկարագրից նրա շեղուելու իրողութիւնը.

...ո՞ր Հայաստանում ենք մենք հիմա,

*եւ Հայաստանը գրկու՞մ է այսօր սպասելու իր ունակութիւնից
ամենաուժեղ գեներ, որ նա փայփայում է դարէդար¹⁴:*

Ըստ Յարութիւնեանի՝ հայ ժողովուրդը յայտնուել է պատերազմի մի նոր տարատեսակի ճիրաններում՝ աղքատութեան.

...աղքատութիւնը նոյն պատերազմն է՝

առանց զէնքի¹⁵:

Եւ այս վիճակն ունի իր հեղինակը կամ հեղինակները. դրանք հայաստանեան ապաշնորհ ղեկավարներն են, որոնց կարծիքով.

...խաւարը լաւագոյն սպեղանին է հոգեվարք

ապրող ժողովրդի համար, ուրիշ ձեւ չկայ՝ դա նապոտի¹⁶ է¹⁷:

Բանաստեղծն ինքն էլ սկսում է տարակուսել, թե իր ապրած ժամանակներում հնարատր է բանաստեղծութիւն ստեղծել, բայց տարակուսանքից ծնում է պատասխանը.

Յեղասպան-դաժան ժամանակներում,

Կը լինի՞ արդեօք բանաստեղծութիւն՝

Կը լինի՞,

եւ կը լինի ցեղասպան ժամանակների մասին¹⁸:

Եւ ուրեմն, պատահական չէ, որ Յարութիւնեանի բանաստեղծութիւնը դատավճիռ է ցեղասպանութիւն երեւոյթի նկատմամբ՝ համաժամանակեայ կտրուածքով: Նրա գրականութեան մէջ մակդիրի արժէք են ստացել Թալէթի շարքաթի գաւաթը՝ լցուած ցեղասպանուած ազգերի արիւնով, եւ Գեքելսի «կոտլէտները»¹⁹՝ մարդու մսից պատրաստուած: Ու եթէ բանաստեղծի անձնական կսկիծը մղում է նրան առաւել յաճախ անդրադառնալ թուրքական թեմային, Արցախին, իր ազգի ապրած արհաւիրքներին, ապա լայնախոհութիւնը մղում է դատապարտումի սլաքներն ուղղել անելի հեռուն ու անելի խորքային երեւոյթների.

Յեղասպանուած ազգերի ճիչը քաշ չունի՝

հերթական ջարդերի ժամանակ այն ցնդում է օդում,

դառնում՝ քաղաքական՝ փաստաթղթի լուրջ՝ վարկած՝...²⁰

Ինչպէս տեսնում ենք, Յարութիւնեանը չի խօսում մէկ ազգի, մէկ մասնատր իրադարձութեան մասին: Նա նպատակ ունի ցոյց տալ, որ ամբողջ աշխարհն է վտանգուած: Ծաղրական բնութագրումներով ներկայացնում է մարդու իրատունքների պաշտպանութեան գաղափարներին ծառայող միջազգային ատեաններն ու տարատեսակ կառոյցները, որոնք հաշուենկատօրէն աչք են փակում աղաղակող յանցագործութիւնների դիմաց.

*...հիմա սպանում են յանուն առաջընթացի՝ ամէնուրեք,
եւ ամէն մեծ երկիր ազգեր բնաջնջելու իր լիմփոն ունի²¹:*

Յարութիւնեանի բանաստեղծութիւնները, որպէս կանոն, ծաալուն են, նա ինքն իր ասելիքը քննում-ծանրութեթեւ է անում երկարաշունչ տողերի, էջերի սահմաններում: Եւ յաճախ այնպիսի վերնագրեր է տալիս բանաստեղծութիւններին, որոնք ասես համառոտագրում են դրանց տակ ներկայացուելիք նիւթը: Զորօրինակ՝ «Հասարակութիւնն Այսօր Դարձաւ 'Էդ Ձեւ' Կամ Ինչպէս Փողոցայինը Կ'ասէր' Նատուի Երգիր» կամ «Դժոխքի Պարունակներում Յայտնուած Հայաստանի Նախկին Նախագահի՝ ԼՏՊի, Նրա Սիրեցեալ 'Էներգակիր' Էներգասպետ Նախարարի՝ Թաշեանի Եւ Միա 'Ջոջերի' Դիային Պար-Շաբաշը 'Քցող' Բանկերի Հետ Ձեռք Ձեռքի Տուած»:

Միայն այս վերջին վերնագրի յենքով կարելի է քրէական գործ յարուցել ու հետաքննել պետական յանցագործութեան մէջ մեղադրուող անձանց, իսկ հայցի անհիմն լինելու դէպքում՝ «անմեղ» մարդկանց զրպարտող գրողին. բայց սա Հայաստանն է, այստեղ օրէնքն ու օրինաչափութիւններն այլ ուղեծրում են պտտում: Եւ բանաստեղծի խօսքը մնում է «ձայն բարբառոյ յանապատի»:

Այսքան քաղաքականացում չափածոյում, թում է, տեղ չունի քնարականութիւնը, յոյզը: Բայց Յարութիւնեանի ստեղծագործութեան վաղ շրջանին բնորոշ բնութենապաշտական թեմաները արտայայտուած են նաեւ նոր գործերում: Արարատ Լեռան, Շուշիի, արցախեան լեռնաշխարհի ֆոնին տեսնում ենք յուզական գրողին՝ բանաստեղծական պատկերներ կառուցելու իր վարպետութեամբ.

Արեւի ուղիդ

հարուածն ապական...

պարուսանները պփրտում են

մութացկանի պէս

շողի հեղեղից...²²:

Շուշիի լուսաբացի այս պատկերը եւ սրա նման այլք հաաստում են, որ բոլոր ժամանակներում, բոլոր իրավիճակներում բանաստեղծը նախեառաջ մնում է քնարերգու:

Էդուարդ Միլիտոնեան (ծն. 1952)

Էդուարդ Միլիտոնեանը հետխորհրդային տարիներին հրատարակել է հետեւեալ գրքերը.- *Վիշապի Տարի* (Երեւան, 1991), *Նոր Թաւարկութիւն* (Երեւան, 1996), *Ընդանեկան Համերգ* (Երեւան, 1996), *Մալահեմեդ* (Երեւան, 2000), *Տեղեկաբու Կարու* (Երեւան, 2001), *Այս Պահին* (Երեւան, 2003), *Վահագն Վիշապաբաղի Արկածները* (արձակ) (Երեւան, 2003), *Զիւ Բայլ* (թատրերգութիւն) (Երեւան, 2004), *Արքայադուստր Թարսիւնէ* (Ե-

րեան, 2010), և (Երեւան, 2013), *Բարձրորդ Կոփու* (մանկական բանաստեղծութիւններ) (Երեւան, 2014), *Սկանդինաւեան Կրօնիգ* (Երեւան, 2017):

Էդուարդ Միլիտոնեանի յետխորրոզային շրջանի բանաստեղծութիւններն իր ապրած ժամանակի գեղարուեստական վաւերագրութիւններն են: Անկախութեան տարեգրութիւնը ցայտուն դրսեւորմամբ առկայ է նրա չափածոյում: Եւ քանի որ անկախացած Հայաստանն այլեւս մեծ կայսրութեան՝ իրաւաբանօրէն չառանձնացող միատոր չէ, այլ ինքնակայ պետութիւն, ապա այդ պետութեան շահերն ու հակաշահերը քննելի են համաշխարհային երթուղարձերի համապատկերում: Եւ ի՞նչ է իրենից ներկայացնում այդ համապատկերը, որ բախտելով հայ ազգային իրականութեան ու անիրականութեան ապառաժին, ընդունում է այլանդակ ձեւեր, ներկայանում հաստ շպարի շերտը թօթափած զառամեալ դէմքի ողջ ահաւորութեամբ: Դա լաւագոյնս երեւում է «Հունգարիայի Գովազդային Վահանակ» բանաստեղծութեան մէջ: Եւրոպական դիւանագիտութեան, արդարադատութեան, նափադղլարներով տարրածութեան, քնած հային կացնահարողի հերոսացման թեմաները բանաստեղծը մատուցում է երգիծական լուծումով.

Սա եւրամիութեան լաւագոյն փիկնիկային թափրոնն է:

Վերջում բաժանում են հերոսի կոչումներ եւ ոսկէ կացիներ

Հոների արքաների պապկերներով:

Իւրաքանչիւր փոքիսփոփ՝ մի կոչում, մի կացի

Եւ մի քրքշացող դափաւճիռ:

Տուրիսպներ բոլոր երկրների, ձեր գլխին կը թեւածի

Դիւանագիտական ժպիտ, այն էլ՝ եւրոպական ժողովրդավարական:

21-րդ դարը այդ ժպիտի դարաշրջանն է: Պարտասպումը²³:

Ժամանակի ու պատմաքաղաքական անցքերի քննութիւնը լայն հորիզոններից գալիս-տեղայնացում է Միլիտոնեանի բանաստեղծութիւններում: Ռուս-վրացական զինուած հակամարտութեան պատկերները ներկայացում են ականատեսի հայեացքով: Տարիներ առաջ տեղի ունեցած այդ կարճառօտ պատերազմի ականայ վկաները դարձան վրացական ծովափերում հանգստացող շատ հայ հովեկներ: Եւ նրանցից մէկը՝ բանաստեղծը, բանաստեղծացրեց այդ պատերազմը ահա այսպէս.

Այս հանգիստն համընկաւ պատերազմի հետ:

Ուրիշ երկրում:

Երկակի սփանդարտների բարկ աւազի վրայ

Մարմինը եփում է՝ կովկասեան խորոված:

Ռուսական լուրեր ուղեղի ծախ կիսագնդի համար:

Վրացական՝ աջ կիսագնդի,

Հայկական՝ մէջտեղի:

Ճշմարտութեան արկն է մարդկանց գլխին ընկած,

Բայց նա պայթել է, եւ ոչ ոք չգիտի նրա տեղը²⁴:

Հարեանի ցափն ցաակից բանաստեղծը, այնուամենայնիւ, ուղեղի կենտրոնում պահում է իր ցալը՝ ազգայինը: Եւ ուրիշի պատերազմի մէջ յայտնուածի ապրումներն անխուսափելիօրէն նրան մղում են դէպի սեփական պատերազմի մասին խոհը. հարեան երկրում յայտարարուած է արտակարգ դրութիւն, հայ հովեկը պիտի ընտրութիւն կատարի՝ մնա՞լ այդ դրութեան մէջ եւ ծովափնեայ արեւին ու աագին փարուած՝ «ժպտալ անհասցէ», թէ՞ վերադառնալ տուն՝ «մի դրութեան» առաւել արտակարգ»:

2015ը իւրաքանչիւր հայի, առաւելապէս՝ մտատրականի, արուեստագէտի համար տրոփում էր մի երակով՝ Հայոց դէմ գործադրուած Յեղասպանութեան 100ամեայ դառնութեամբ առկեցուն: Միեւնոյն ներշնչանքի տարբեր երկնամների ականատես ու ականջալուր եղանք այդ ընթացքում: Միխիտոնեանի գիրը մեզ պատմեց 1915ի իր ցալը՝ սարիթաղեան մանրանուագներով: «15 Թիւր Սարի Թաղի Մեր Փողոցում» շարքը իր առերեսոյթ հանդարտ պտոյտի մէջ է առնում ընթերցողին ու տանում հայրենադարձներով բնակեցուած ծուռումուռ դարուփոսերի աշխարհը՝ երեանի կորչող պատկերն իր վրայ կրող Սարի Թաղ, որի բնակիչները լուրթեան մէջ, առօրեայ համակերպումի ընթացքի մէջ, միեւնոյն է, մոնչում են ապրած սարսափի, կորցրածի, չգտնուողի ցափից: Այստեղ Ղազար քեռին է՝ իր ձեռքերով Մասիս Սարի կրծքին քրոջ համար գերեզման փորած ու հողից դուրս պրծած նրա շորի սպիտակ փէշի ծածանումին ակնդէտ հետետող, հիւան Գրիգոր Հոգիկեանը, տիկին Յասմիկը, Յակոբ ախպարը, որ պիտի ապրեն նոր ցեղասպանութիւն՝ հայրենիքից արտագաղթած զաւակների տեսքով, սիրիացի պառաւ տատմէրը, որի ժանգոտ դանակը գրողի երեւակայութեան մէջ պիտի խաչով թուրքական եաթաղանի հետ, Հոգիկեան Պարգեւը, որ պիտի 1965ի ազգային զարթօնքի անհասկանալի շօշափումները բերի Սարի Թաղ՝ Ամերիկա տեղափոխուելուց առաջ: Եւ էլի շատերը՝ իրենց պատմութիւններով: Իսկ 1915ի չսպիացող վերքը պիտի բորբոքուի Հրանդ Տինքի կօշիկի ներբանից նայող սեւ ծակի տեսքով.

Հրանդի Դինքը զարկուած, ընկած էր

Սկրամբուլի Շիշի փողոցում:

Նրան շարերն էին համեմատում

Աղանու հետ,

Բայց թռչունը, ինչպէս բոլորդ գիտէք,

Կօշիկ չունի,

Իսկ Հրանդի կօշիկը ծակ էր

Ու զարմացած, քարացած անքըը

Շիշի փողոցի անցորդներին,

Սկրամբուլի վեր ու վարին,

Երկնքի ամպերին

Նայում էր կոյր աչքի նման:

100 տարի յետոյ էլ վրանգաւոր է Թուրքիայում խօսել

*Հայոց եղբունի մասին,
երբ կօշիկդ ծակ է,
ես անցքը նման է
Տիեզերքի ակնախոռոչում անտարբեր պտտւող
երկրագնդի²⁵:*

Միլիտոնեանին անհանգստացնող թեմաներից է նաեւ իր քաղաքի եւ քաղաքացու անհետացող դիմագիծը:

Բայց նա նաեւ երագող է: Նրան գրատւում են բնութիւնը, կանայք, մարդկային թուլութիւններին չընդդիմանալու անհրաժեշտութիւնը: Տարիքի, կենսափորձի, աշխարհընկալման որակները բանաստեղծական երագայնութեանը ներարկում են հաւասարակշռութեան խաբկանքը:

*Մտապարկերների ջունգլիներից դուրս պրծան
Ներածի՞գ մերկանդան կանայք,
Նրանք անխնայ զարկում էին նրանց,
Ուլքեր գիծ էին քաշում
Միտոյ եւ սեքսի միջեւ:
Սէրը սոցիալիզմի որդեգիրն էր,
Սեքսը՝ կապիտալիզմի²⁶:*

Քանի որ բանաստեղծի երկխօսութիւնը տիեզերքի հետ է, ուստի Աստծոյ հետ բանավիճելը՝ հաւասարը հաւասարի իրաւունքով, վաղուց չի զարմացնում: Եւ Միլիտոնեանը բացառութիւն չէ: Նա չի երկնջում հաւասարի իր իրաւունքին խառնել ամբարտաւանութեան տարրը:

*Ես գրեցի հոնորարի եւ փառքի համար,
Իսկ դու, Աստուած, ի՞նչու էր պակաս²⁷:*

Հարցերի, պատասխանների, անհասցէ ու հասցէագրում ուղերձների այս ամբողջութիւնն էլ պայմանաւորել է Միլիտոնեանի յետխորհրդային շրջանի չափածոյի կերպը, որի յետագայ զարգացումներում չի բացառոււմ որեւէ անակնկալ:

Յակոբ Մովսէս (ծն. 1952)

Յակոբ Մովսէսը յետխորհրդային տարիներին հրատարակել է հետեւեալ գրքերը.- *Գիրք Ծաղկման* (Երեւան, 1992), *Բանաստեղծութիւններ* (Երեւան, 2005), *Լոյս Ջուարթ* (Երեւան, 2009), *Եօթներորդ Որսորդութիւն* (Երեւան, 2013), *Գրառումներ* (Երեւան, 2015), *Ճարական* (Երեւան, 2017), *Գրառումներ 2* (Երեւան, 2017):

Յետխորհրդային ժամանակաշրջանում եղան բանաստեղծներ, որոնք ոչ միայն բանաստեղծեցին, այլեւ մասնակցեցին նորաստեղծ պետութեան կառավարմանը: Դրանցից մէկն է Յակոբ Մովսէսը²⁸: Նրա բանաստեղծութիւնը, եթէ անգամ յանգաւորում չափածոյ է, արձակ պատումի տպատրութիւն է թողնում: Թում է, թէ սպիտակ, անյանգ տողերով պատմութիւն եւ կարդում: Երբեմն - կամ շատ յաճախ - ընդհանուր շարադրանքի

մէջ դժուար է տարորոշում, առանձնանում բառը. տրտամ ես ընթերցումի ընթացքին եւ չես որոշակիացնում այս կամ այն բառը, այս կամ այն արտայայտութիւնը, ինչպէս լինում է երաժշտութիւն լսելիս, երբ ունկնդիրն ես դառնում ոչ թէ առանձին նոտաների, այլ մեղեդու: Բայց մէկ էլ ինչ-որ շեշտակի ազդակ քեզ դուրս է բերում խաղաղ, մեղեդային նիրվանայից: Կտրուկ կանգ ես առնում, սթափում, որովհետեւ հանդիպել ես ինչ-որ տողի, բառի, որը ներդաշնակ լինելով քեզ իր մէջ առած համանուագին՝ առանձին ուժգնութեամբ է բախտել զգայարաններիդ, ապրումի ու խոհի նոր մակարդակ է բացել քեզ համար:

Տեղ-տեղ պարզապէս բանաստեղծական պատկերն է գծագրում՝ իրեն ստորադասելով դրա տակ քողարկուած ասելիքը: Գրողի անդրադարձները աշխարհարարումի, աշխարհաւերման, մահուան խորհրդին, որքան էլ ինչեղանում, միեւնոյն է, չեն ստուերում բանաստեղծական պատկերի հմայքը, չեն խանգարում խոհի հոսքում զատորոշել այն.

Արշալոյսի գրկում

Լոյսի կաթնափամբ արդէն

Լինդն էր ճեղքել²⁹:

Յակոբ Մովսէսը մտորում է բանաստեղծի առաքելութեան, նրան վիճակուած գոյածելի շուրջ: Փորձում է բանաձեւել բանաստեղծ-երեսոյթը՝ նրան դիտարկելով իրեն աշխարհի եւ Աստծոյ միջեւ ձգտող կամուրջ, իբրեւ ոսկեխոյզ, որ ուզում է «բառերի ոսկին կորզել»:

Բանաստեղծը կանգնած է աշխարհարարման եւ աշխարհաւերման հատման կէտում: Նա է, որ պիտի վկայի արարումը, նաեւ՝ վաւերագրի անհնարինը, անշրջելին.

Երկու հոգի գնում էին

Եւ իրար հետ խօսում եղածների մասին

Եւ Կրկնած էին,

Այդ ու՛ր, ու՛ր այսպէս վաղ,

Դէմները կտրեցի ես,

Մենք գնում ենք առաջն առնենք, ինձ ասացին,

Քանզի աշխարհը, մենք այդպէս ենք լսել,

- Զոջացել է իր արարման համար

Եւ ուզում է անցնել³⁰:

Եւ քանի որ բանաստեղծը ամենալարուած պահերի, ամենաճակատագրական դիպուածների տարեգիրն է, ուստի, մեծ հաշտով, անհաղորդ է մարդկային պարզ ուրախութիւններին: Նրան խորթ է խրախճանքի վայելքը: Բանաստեղծը թախծում է այն պահերին, երբ ենթադրում է համընդհանուր ուրախութիւն: Ու նրա երկխօսութիւնն այս դէպքում իր արցունքի հետ է.

Այնուիստեւ նախաբեստուած էր ծափ ու ծիծաղ,

Բայց դու, արցունքի՛ կաթիլ,

*Այդ ինչու՞ դու
եկար³¹:*

Արեւմտեան Հայաստանի պատկերները, որքան էլ որ քողարկուած են խոհի ու քնարականութեան շղարշով, տազնապի, ցափ, կորստի զգացողութեան շեշտադրումներից զերծ չեն մնում: «Կոստանդնուպոլիս: Սուրբ Սոֆիա 1993» բանաստեղծութեան մէջ կարդում ենք.

*Ես մի պահ մոլորուեցի
Եւ, շրջուելով, յանկարծ տեսայ ժամանակը
Սուրբ փառարի պապի տակ՝
Թուրը ձեռքին եւ կապաղի,
Մօր գրկից մանուկ հասակում
Դարեր առաջ խլուած
Ենիշերին³²:*

Ու Աստծուն յղուած ոչ-յանդուգն դատապարտում կայ այս բանաստեղծութիւններում, բայց եւ զուսպ դատապարտումին զուգահեռ՝ Աստծուն ճշմարտութեանը հասու դարձնելու, իր բացթողումին իրազեկելու նպատակ, այդ բացթողումը շտկելու աղերս-պահանջ, որ այսպէս է ձեակերպում «Աղթամար: Սուրբ Խաչ 1993» բանաստեղծական պատումում.

Տէ՛ր, եթէ դու մօտը լինէիր, մեռած չէր լինի նա³³:

Այնուամենայնիւ, բանաստեղծն ունի ազգութիւն: Նրա համատիեզերական ներշնչանքը, դէպի երկինք ձգտող էութիւնը նիւթականանում է, անգամ դառնում կենցաղային, եթէ իր ազգային նախասկիզբը ինչ-ինչ պատճառներով դէմ է առել խութերի եւ շեղուել իր համար նախասահմանուած ընթացքից: Յակոբ Մովսէսն իր ազգը, իր ծինատիպը տեսնում եւ տեսցնում է երկնային հոլովոյթում. հայերը երկնքի պատուիրակներն են այս հողագնդի վրայ, որ անկախ ժամանակի ու պարագաների կենցաղային պարտադրանքից՝ յամառօրէն չեն լքում ի սկզբանէ իրենց վերապահուած տիեզերական տարածութիւնը եւ չեն տրտւում վաղանցիկ հողմերին.

*Իմ երկրում հիմա նեղութիւն է, ալիւր՝ քիչ,
Բայց իմ բռնները միշտ երկնքից են եկել³⁴:*

Այսպիսին էր հայի կենցաղապատումը 1993ին, եւ ալիւրի սակաւութեան թեման չէր կարող շրջանցել հայ բանաստեղծին: Բայց դրան հետեւում են այլ ժամանակներ, որոնք բերում են այլ խոհեր եւ զգացումներ: Բանաստեղծը՝ հերթական նաւաբեկութիւնից վերապարածի բախտաւորութեամբ, հանապազօրեայ հացն ունեցողի ապահով զգացումով տրտւում է փիլիսոփայելու վայելքին: Այս դէպքում նա ինքն իր համար գաղափարներ է արտածում, որոնց հետ կարող է ընթերցողը, երբեմն նաեւ՝ հենց ինքը համաձայն չլինել.

*Ո՛վ դուք անկումներ եւ կործանումներ,
փլուզումներ եւ կորուստներ անհուն:
Գուցէ ձեզն՝ ո՛վ է յանքոժութիւնն իր երկնային*

որջում ծագերին սնում³⁵:

Որոշ դեպքերում բանաստեղծը պարզապես վերածում է հեքիաթասացի եւ հրամցնում հետաքրքրաշարժ պատմություններ, որոնք ընթերցելիս չես զգում ո՛չ գաղափարի, ո՛չ պատկերի, ո՛չ էլ բառի ներկայությունը: Ընդամենը ցանկանում ես իմանալ, թե ինչ կը լինի հեքիաթի վերջում: Ահա մի քաղուածք «Վկայություններ» ստեղծագործությունից.

*Եթէ անցորդը, կանգնած ջրերի դէմ,
Ունկը պարզել է նուագներին մահի
եւ հագել է իր սանդալները արդէն,-
Դուք նրան այսպեղ այլեւս չէք պահի³⁶:*

Երբ կարդում ես այսպիսի տողեր, հետաքրքրությունը յաղթում է դատողութեան ուժին. արդէն հեքիաթասացի որսացանցում ես, հասկանում ես, որ ինչ-որ նորօրեայ առասպելաբանություն է հիւստում, եւ դու այլեւս ընդամենը բանաստեղծություն չէ, որ կարդում ես:

Սիրերգութեան մէջ եւս գիտարար է Յակոբ Մովսէսը: Նա երեւան է հանում, սիրոյ անունը չտալով, սիրոյ մասին խօսելու բանալին.-

*Սէրն անուն չունի: Կամաց մօտենում
եւ իր անունը նա մեզ է դնում:
Յոյսը իր վերջին շապիկն է հանում
եւ արտասուելով մեզ է հագցնում:
- Օրապահիկն է քարերին բացում,
Բայց չի ուրում, այլ - մեզ է մաքրուցում:
Սէրն անուն չունի,- մերկ եւ անանուն,-
Բայց նա բոլորիս անուն է դնում³⁷:*

Ըստ նրա՝ բանաստեղծը ոչ թէ արարող է, այլ հպատակ: Նա հպատակի իր վախերն ունի, չբաւարարելու, չտոկալու տագնապը: Տիրակալը ներշնչանքն է, երգը, որին գոհացնել է հարկատր, եթէ անգամ պատրաստ չես դրան, եթէ անգամ նա իր հրամանն արձակել է քեզ համար ոչ բարեպատեհ ժամի.

*Գիշերը դարձեալ մայրներն է դնում
Իր երենոսեայ նուագարանին:
Մթութեան խորքում երգն է բարձրանում:
Այդ նրա թելն է հիատում մութրիմ:
Բայց ես ի՞նչ անեմ, եթէ շարանին
Պէկը չգայ բերած մարգարիկը իմ³⁸:*

Բանաստեղծումին յաջորդած վիճակն էլ նոր բանաստեղծութեան, նոր հրամանի սպասումն է համատարած: Ու անվերջանալի այս պտոյտի մէջ՝ բառախաղերի, բառատարափի, բառաշինութեան խառնարանում, «որսին դարանակալած»՝ սպասում է բանաստեղծը, մինչեւ որ բառախեցու մէջ կը հասունանայ հերթական մարգարիտը.

Պահակութեան է կանգնած աշխարհում ջրերի վրայ

*բառն՝ իրի հոգին,
իրը իր անուան մարգարիտըն է իր մէջ խեցու պէս
հասունացնում փեղկերում իր զոյգ³⁹:*

Արմէն Շեկոյեան (ծն. 1953)

Արմէն Շեկոյեանը յետխորհրդային տարիներին հրատարակել է հետեւեալ գրքերը.- *Թուղթ Ու Գիր* (Երեւան, 1991), *Անփայտէզիա* (Երեւան, 2000), *Երեւան-Հիւրանոց* (Երեւան, 2003), *Մեղաքսի Ճանապարհ* (պատմուածքների ժողովածու) (Երեւան, 2004):

Արմէն Շեկոյեան անունը զուգակցում է թարմութեան ու անսովորութեան հետ: Այս հեղինակի իւրաքանչիւր նոր գործին առնչուելուց առաջ անսպասելիի սպասումն ես ունենում: Շեկոյեանի յետխորհրդային շրջանի բանաստեղծութիւնն ամփոփուած է *Երեւան Հիւրանոց* եւ *Անփայտէզիա* գրքերում: Շեկոյեանը Երեւանի երգիչն է՝ առաւելապէս թաղուած նրա խոլ ու անծանօթ յետնախորշերում, որոնցից բանաստեղծութեան համար նիւթ քաղելն արդէն իսկ բանաստեղծական մեծ սխրանք է ենթադրում: Նրա բանաստեղծութիւնն առտնին զբաղմունքի, առօրեայ զրոյցի կաղապարն է կրում, սակայն այդ կաղապարից ներս անյատակ խորութեան, անեզրութեան տարածութիւններն են քօղարկուած:

Բանաստեղծի քնարական հերոսը երեւանցին է՝ իր մտահոգութիւններով, իր հիասթափութիւններով, իր կենսասիրութեամբ, իր ծաղրով սեփական անծի ու միջավայրի հանդէպ:

Ես դեգերելով շարունակուեցի

Երկիր յորջորջուող լաբիրինթոսում:

Շարունակում եմ անվերջ ու հոսում

անանցանելի ու մութ էս փոսում:

Շարունակում եմ էս անլոյս մթնում.

քչփորում եմ, բայց ելը չեմ գտնում⁴⁰:

Պատկերը դառնում է մի ճկուն ատաղծ, որի առանցքում հեղինակն է, իսկ նրա բազմանկիւն տեսադաշտում զատորոշում են քաղաքի դէմքերը.

Ինձ գիտեն բոլոր մեղատրները,

մօրութատր ու բէղատրները,

անմօրուաները եւ անբէղները,

անմեղսունակներն ու անմեղները,

բոլոր գիտուններն ու թերուաները,

նամուսովներն ու աննամուաները:

Ինձ գիտեն բոլոր նկարիչները,

մուրիլովիկներն⁴¹ ու սադրիչները,

բոլոր օձերը եւ կարիճները,

ենթակաները եւ վարիչները:

Ինձ գիտեն բոլոր գրամուլները,

Ինձ գիտեն բոլոր խաղամուկները,
 որ խարխափում են էս անլոյս մթնում:
 Նրանք ինձ գիտեն, սակայն չեն գտնում:
 Ինձ գիտեն նախկին ու նոր փերերը,
 որ ճիշդ բաշխեցին մեզ մեր դերերը:
 Ինձ գիտեն նաեւ վարձակալները,
 գիտեն հին ու նոր գործակալները,
 որ խարխափում են էս անլոյս մթնում:
 Ինձ գիտեն, սակայն հեղքս չեն գտնում:
 Ինձ գիտեն բոլոր մուրացկանները,
 բոլոր ծախորդներն ու վարձկանները,
 ինձ գիտեն բոլոր ընչազուրկները,
 ինձ գիտեն բոլոր գործազուրկները,
 գիտեն քաղաքներն ու խուլ գիւղերը,
 գիտեն ջեբկիրներն ու լուրջ գողերը,
 ովքեր ցնծում են էս անլոյս մթնում,
 զի՛ ամէնուրեք աւար են փնտրում⁴²:

Ակնառու է, թէ որքան անսահմանափակ ու բազմաշերտ է Շեկոյեանի հայերէնահիմնացութիւնը: Նա վարպետօրէն խաղացնում է հայերէնի հարուստ բառանիւթը, իր բանաստեղծական խօսքում համադրում գրականից մինչեւ փողոցային բառաշերտ ու հայիոյախօսութիւն ձգտող բառատարածութիւնը: Ու թէւ ակնյայտ է, որ բանաստեղծի խօսքը ներամփոփում է դառնութեան, իրականութիւնից իրաւացի դժգոհութեան չափաբաժին, այլուստանդերձ, Շեկոյեանը լի է սիրով իր բաժին աշխարհի ու այդ աշխարհի բնակիչների հանդէպ:

Ես սիրում եմ Ձեզ, չնայած երբեք
 չէք պատասխանել իմ խեղճ հարցերին:
 Սիրում եմ անցած-գնացածներին,
 սիրում եմ եկած-մնացածներին,
 խեղճ կոտորուածին ու սուր կարծրին,
 մօտիկ ցածրին, հեռու բարձրին,
 անխելփիր բոլոր մնացածներին՝
 ովքեր սովոր են փափուկ բարձերին,
 ովքեր սովոր են բանփ ու կարցերին⁴³,
 բոլոր բարձրացած ու ցցուածներին,
 բոլոր բարձրացած ու զցուածներին,
 բոլոր բարձրացած ու ձգուածներին,
 բոլոր բարձրացած ու յղկուածներին,
 բոլոր խեղճացած ու քցուածներին,
 բոլոր խեղճացած ու կքուածներին,
 բոլոր խեղճացած ու լքուածներին:

Սա կեանք չէ. համակ Սէր է՝ լոյսի փօն.
եւ Սէրն ամուր է՝ զերդ ցեմենտբերոն.
եւ Յոյսն ամուր է՝ զերդ ցեմենտբերոն:
Կը սիրեմ Ձեզ ու Կեանքն այս, քանի դեռ
նախագահը չի դրել իր վեպօն⁴⁴:

Սէրն այլ չափումների ու քնորոշիչների ծիրում է յայտնում, երբ դառնում է տղամարդու սէր՝ առ կինը. այս դէպքում կեանքը գունեղ ու վառվոռն է պատկերանում, սիրահարները՝ արքայական ներյարդարանքով.

Ձմեռն անցաւ: Աստուած իր հեպ.

զեա՛յ էլ, գա՛յ էլ:

էս ընթացքում դու ոչ մի օր

չես բացակայել

մրաժմունքից իմ շուրջօրեայ՝

ճոխ ու գունատր,

ուր դու անվերջ թագուիի ես,

ու ես՝ թագատր⁴⁵:

Իր ապրած կեանքին անդրադարձումներում բանաստեղծը գծում է մեր ընդհանրական գոյութեան պատկերը. մենք սիրում ենք պանծացնել մեր անցեալն ու դժգոհել ներկայից: Ապրում ենք՝ չզգալով ապրածի հմայքն ու իրեղէնութիւնը, ամէն բան ընկալում ենք իբրեւ փորձութիւն ու փորձարարութիւն: Սա գոյութեան մեր ինքնօրինակութիւնն է, որն այսպէս է բանաստեղծում Շեկոյեանը «Փորձնական Եթեր» ստեղծագործութեան մէջ.

Կեանքը սա՞ է, Տէր իմ, թէ՞

էլի բաներ կան:

Անվերջ քաղցր անցեալն է

ու փրփրալ ներկա՞ն:

Մերթ խնդում եմ, մերթ լալիս՝

որպէս մի Վերթեր:

Կեա՞նք է արդեօք, Տէր իմ, թէ՞

փորձնական եթեր⁴⁶:

Շեկոյեանն ունենում է նաեւ ստեղծագործական ներշնչանքից օտարուելու զգացումը, խոստովանում, որ բառն իր գրչի տակ այլեւս դժուարանում է «հուրիւրալ»: Բայց եւ չի կորցնում պրպտելու, անիմանալին երեւան հանելու ձգտումը, չի դադարում այդ որոնումների մէջ ներքաշել Բարձրեալին, որին դիմում է այսպիսի տողերով.

Անհնարին էր լինել էսքան

անյիշաչար ու ներողամիտ,

բայցեայնպէս՝ Դու եղար, սակայն

Դու երեխայ չես. Դու միամիտ

մի երեխայ չես. եւ այսօրեղից

չես հեռանալու՝ մինչեւ դարձեալ

*ճանաչենք Քեզ. ու մեր անիծեալ
յիշողութիւնը շարժենք տեղից՝:*

Յովիկ Հովէեան (ծն. 1956)

Յովիկ Հովէեանը յետխորհրդային տարիներին հրատարակել է հետեւեալ գրքերը.- *Արահեպ* (Երեւան, 1990), *Աստղագուշակ* (Երեւան, 1995), *Արեգակն Արդար* (Երեւան, 1997), *Թափառական Ամառներ* (Երեւան, 1999), *Ծէս* (Երեւան, 2000), *Ժայռագրեր* (Երեւան, 2003), *Ուրարտական Անձրեւներ* (Երեւան, 2009), *Յիշողութեան Կառ* (Երեւան, 2011), *Վրիպած Ջրհեղեղ* (Երեւան, 2014), *Քամիների Վերադարձը* (պարսկերէն, Թեհրան, 2015), *Անժամանակություն* (Երեւան, 2015):

Անկախութեան շրջանի բանաստեղծական դաշտում առանձնացող ներկայություն է Յովիկ Հովէեանը: Նա առասեպալականի, անմեկնելիի, անիմանալիի խորհուրդներով տարուած յօրինող է: Իր ներաշխարհի որոնումներին հետամուտ՝ նա այսօրուայ ապրումի սաղմերը շօշափում-երեւան է հանում հնամենի պատմութեան խորաշերտերում, որոնց միջից երեւակոտմ են հեռաւոր ժամանակների առարկայօրէն յստակ պատկերները՝ մերօրեայ տագնապների արձագանգներով:

Հովէեանն անվերջ փնտռողի մէջ է. գտնում ու չի գտնում ինքն իրեն, իր նախահայրերի, արքաների, հաւատալիքների շափոնները: Նրա ժամանակացոյցը յաճախ դուրս է ելնում արեգակնային ծիրից ու տրտմ ինքնագլուխ չափուծեւումների սլացքին. ըստ այդ ժամանակացոյցի՝

Աշունն անց է

Մի փունջ հիացում

Ովկիանոսն անց է

մի վերջին գեղամէջ

Ժամանակն անց է

մի ողջ անժամանակություն...⁴⁸:

Ինքնորոնումի ուղին դառնում է չվերջացող մի ճանապարհ՝ բազում ու տարաբնոյթ կանգառներով: «Փշաքաղուած խաչերով» լեցուն Եփրատի ափին, օրինակ, նրա կանգառը արաբ ձկնորսի ձեռամբ ափ հանուած տատի հետ նախասահմանուած հանդիպումով է պատճառաբանուած.

Արաբ ձկնորսը

Խաչ էր որսում...

Այս մէկն

Իմ տապն էր՝

Արնոյթ թեփուկներով...⁴⁹:

Յետոյ ինքնորոնումը երկրայինից տեղափոխում է երկնային սահմանագծերի ոլորտ, ու ելքի չգտնումը բանաստեղծին չի ընկճում. ճարպիկ մի հնարքով նա իր ու մեր բոլորի համեստ բոյնն է հիւսում Փրկչի տիրոյթներում եւ փաստօրէն նախանշում ինքնափրկման ամենահաւաստի ուղին.

*Յիսուս Քրիստոս՝
Երկնքի ու Երկրի միջեւ
Անվերջօրէն ծաալուող
Ձեռագիր մարեան...
Եւ ես՝
Տողադարծդ
Չնչին...⁵⁰:*

Հովէեանի բանաստեղծութիւններում ժամանակակից ու անգամ ոչ-բանաստեղծական աղմուկը տարեբայնօրէն մխրճում է քնարական գանձերի միջնադար եւ հասնում դրանից էլ անդին՝ իր պտոյտի մէջ առնելով նախաջրհեղեղեան առեղծուածային ժամանակներից մինչեւ «թափանցիկ» նախընտրականը, մագաղաթաբոյր ծիսանուագներից մինչեւ մերսեդէսի չչակներն ու «ջագի հատապտուղներից պատրաստուած կոկոտէլները», անցեալի մարմրող թափառական երազներից մինչեւ մոնիթորինգային վագքերը ծաալուող անցուդարձերը:

Նրա գրքերը՝ պատմական ու նախապատմական ժամանակներն ակնարկող վերնագրերով (*Յիշողութեան Կաւ, Ուրարտական Անձրեւներ, Վրիպած Ջրհեղեղ, Անժամանակութիւն եւն.*) յուշում են, որ դրանց էջերում ընթերցողը գտնելու է անյայտ ու անմեկնելի ինչ-որ ժամանակների կամ անժամանակների ընթացագրութիւնը: Եւ իսկապէս էլ գտնում է:

«Նէօհայկական Ֆուտիլը» շարքում մենք տեսնում-յայտնաբերում ենք փոքր-ինչ անսովոր Հովէեանին: Իր ապրած ժամանակի բանաստեղծացումը նա սովորաբար մատուցում է բոհեմական նրբերանգներով, սաքսոֆոնաջագային մանրանուագների ելեւէջներով, ինչ-որ տեղ քաղքենիօրէն շքեղ փայլով: Այնինչ այս շարքում տեսնում ենք նոր «այսօրապատում», որը հողեղէն է, կոպիտ, ասֆալտամերձ, հմայաթափ:

*Ամազոնից մի քիչ հարաւ՝
Տեղափարափ թուփակների,
Մեր շէն կեանքը էս ի՞նչ դառաւ՝
Ջրօսանաւ ախմախների:
Սխա՛ն, սխա՛լ աններելի՝
Իրանում՝ նաւթ, Դանիայում՝ նաւ,
Հայաստանում կարկուտն էլի
Ծիրանի սաղ բերքը փարաւ:
Ամազոնից մի քիչ հարաւ
Շղթյ մի հայ դաշա առաւ...
Արա վա՛յ-վա՛յ. հա՛ֆ-հա՛ֆ, հա՛ֆ-հա՛ֆ...⁵¹:*

Գուցէ իր ապրած ժամանակն է փոխուել, գուցէ ինքը՝ Հովէեանը: Բայց անկախ սպասելի ու անսպասելի որեւէ փոփոխութիւնից՝ Հովէեանի գիրը միշտ հետաքրքիր է, գաղտնաշատ, հանելուկային:

ԵԶՐԱՓԱԿՈՒՄ

Պայմանականորեն վերջակետելով մեր ուսումնասիրությունը՝ ես մեկ անգամ նշեմք, որ հեղինակները, որոնց անդրադարձել ենք, լինելով մեթոդական գեղարուեստական չափաձույ խօսքի ակնառու ներկայացուցիչները, այնուամենայնիւ իրենցով չեն սպառում այն ողջ ասելիքն ու բանաստեղծական դաշտը, որը բնորոշում է որպէս յետխորհրդային շրջանի հայ քնարերգութիւն: Այդ քնարերգութիւնը շատ ամելի հարուստ է, բազմազան, գունեղ, եւ այն ամփոփ կերպով ներկայացնելը, անտարակոյս, մեկ մարդու եւ մեկ յօդուածի սահմաններում չտեղատրուող տարածութիւն է:

ԾԱՆՕԹԱԳՐՈՒԹԻՒՆՆԵՐ

¹ *Իրադես Պարբերական*, 12 Դեկտեմբեր 2014:

² Հենրիկ Էդոյեանը ներկայացուող բանաստեղծներից ամենաազն է տարիքով: Մեր վերլուծութեան մէջ բանաստեղծները ներկայացուած են այդ սկզբունքով՝ ըստ տարիքի:

³ Հենրիկ Էդոյեան, *Երկերի ժողովածու*, Հտր. 2, Երեւան, Վան Արեան, 2010, էջ 19:

⁴ Նոյն է՝ սրճարան:

⁵ Նոյն, էջ 125:

⁶ Նոյն, էջ 196:

⁷ Նոյն, էջ 37:

⁸ Նոյն, էջ 136:

⁹ Նոյն, էջ 283:

¹⁰ Նոյն, էջ 327:

¹¹ Նոյն, էջ 323:

¹² <https://gisher.org/artem-harutyunyan-t21802.html> :

¹³ Նոյն:

¹⁴ Արտեմ Յարութեան, *Հեռուադապտէմներ 'Շուշի' եւ 'Բաքելոն' Հիւրանոցների Աշտարակից*, Երեւան, Տիգրան Մեծ, 2010, էջ 255:

¹⁵ Նոյն, էջ 295:

¹⁶ Ռուսերէն աղաաղուած արտայայտութիւն, որ նշանակում է բնական, ճիշտ:

¹⁷ Նոյն, էջ 132:

¹⁸ Նոյն, էջ 63:

¹⁹ Աղացած մսից պատրաստուած կերակրատեսակի ռուսերէն անուանում:

²⁰ Նոյն, էջ 188:

²¹ Նոյն, էջ 191:

²² Նոյն, էջ 70:

²³ Էդուարդ Միլիտոնեան, է, Երեւան, Ծիծեռնակ Հրատ., 2013, էջ 80:

²⁴ Նոյն, էջ 30:

²⁵ <http://www.grakantert.am/%D5%A7%D5%A4%D5%BE%D5%A1%D6%80%D5%A4-%D5%B4%D5%AB%D5%AC%D5%AB%D5%BF%D5%B8%D5%B6%D5%B5%D5%A1%D5%B6-15-%D5%A9%D5%AB%D5%BE%D5%A8-%D5%BD%D5%A1%D6%80%D5%AB-%D5%A9%D5%A1%D5%B2%D5%AB-%D5%B4%D5%A5/> :

²⁶ Միլիտոնեան, է, էջ 236:

²⁷ Նոյն, էջ 169:

²⁸ Նա 1991-1996 թուականներին ՀՀ մշակույթի նախարար էր:

²⁹ Յակոբ Մովսէս, *Եօթներորդ Որսորդութիւն*, Երեւան, Անտարէս, 2013, էջ 28:

³⁰ Նոյն, էջ 64:

³¹ Նոյն, էջ 315:

³² Նոյն, էջ 21:

³³ Նոյն, էջ 201:

³⁴ Նոյն, էջ 147:

³⁵ Նոյն, էջ 301:

³⁶ Նոյն, էջ 178:

³⁷ Նոյն, էջ 65:

³⁸ Նոյն, էջ 38:

³⁹ Նոյն, էջ 258:

⁴⁰ <http://granish.org/hotel-yerevan/>

⁴¹ Ռուսերէն եզրոյթ, որ նշանակում է խառնակիչ, քանսարկու:

⁴² Նոյն:

⁴³ Ռուսերէն եզրոյթ, որ նշանակում է պատժախուց:

⁴⁴ Նոյն:

⁴⁵ <http://www.yerkir.am/news/view/58534.html>

⁴⁶ Նոյն:

⁴⁷ Նոյն:

⁴⁸ Հովիկ Հովէեան, *Ուրարտական Անձրեւներ*, Երեւան, ԳԱՄՐԻՆՏ, 2010, էջ 45:

⁴⁹ Նոյն, էջ 124:

⁵⁰ Նոյն, էջ 240:

⁵¹ Հովիկ Հովէեան, *Անժամանակութիւն*, Երեւան, Հայագիտակ, 2015, էջ 204:

IMAGES OF POST-SOVIET ARMENIAN POETRY (Summary)

Karine Rafaelian

karine.rafaelyan@mail.ru

The article is a brief overview on post-Soviet-Armenian poetry. It highlights the writings of contemporary Armenian poets Henrik Edoyan, Artem Harutyunyan, Edward Militonyan, Hakob Movses, Armen Shekoyan and Hovik Hoveyan and the issues they raise: love, patriotism, life and death, political and historical events, simple daily and deep philosophical issues, etc.